

■ COLUMNA

Lila

DAD AITA DERMONT-STUPAN

Jau avr la stgaffa da vestgadira. Betg in bategl n'è da chattar en lila u insatge sumegliant. Na, quai n'è propi betg mia color. Ina giada, pli baud, avev'jau cumprà in toc taila d'in tschert violet che ma plascheva. Jau aveva fatg in vestgi londerora, aveva tessì ina bordura cun verd cler, cotschen vin e mellen per enturn culiez e davant giu. Jau ma regord ch'jau al purtava giu'l Vallais nua ch'jau fascheva in praticum en ina stiva da taisser. En sortida vev'jau emprendì ad enconuscher in tip e l'auter di al hai jau entupà sin via. El metteva insatge cabels en in foss. I pendeve si be il chau. El m'ha guardà da sut si ed ha ditg: «Wos isch dos für on Sock?»

Betg idea nua che quel vestgì è vegnì via. Forsa al hai jau anc duvrà dus onns pli tard, ch'jau era en speranza. En mintga cas hai jau pir da quel temp cumenzà a m'occupar cun dumondas da dunnas e feminissem. Jau veva 24 onns. In pèr onns avant en scola media aveva in magister vulì confruntar nossa classa cun structuras da famiglia, patriarcat e rollas dad umens e dunnas. Ma quai



era lunsch davent da noss interess. Nagin ch'aveva mirveglia. Tge gieva quai tiers a nus?

Sco giuvna mamma maridada lura m'èsi vegnì conscient da tge ch'el tschantschava. Che tut n'era betg uschè cler che quai ch'i paraiva dapi generaziuns. I deva per mai bain inquala chaussa da metter en dumonda, dal 1981. I m'interessava da savair co ch'autras dunnas pensan o scrivon, da leger chaussas che pertutgavan er mai, davart la rolla da la dunna en la societad. Jau era perfin ida magari a Cuira a scuntradas da dunnas. I ma fascheva bain da barattar opiniuns cun dunnas che s'occupavan da quel tema. Betg ch'jau fiss stada ina da quelas che tirava il char, na, ma jau hai adina admirà dunnas ch'han il curaschi da s'exponer e dir lur opiniun en la publicitad.

Jau crai gist quai è il grev: s'exponer en la publicitad, en la politica ed er en la professiun. Mintgatant vegni rinfatschà a las dunnas ch'ellas na sa mettian betg a disposiziun per posts exposts en la politica ed en l'economia. Qua hai jau tutta chapientscha. Suenten tschientaners che la societad è vegnida dominada dals umens èsi pretendì blier d'ina dunna da siglir entaifer be gnanca tschuncant'onns en quellas structuras, anc adina masculinas, e da sa far valair.

Perquai in grond engraziament a quellas che han rabitschà la posiziun da las dunnas nua ch'ella è uss e grond respect a quellas che cuntinueschan e s'engaschan cun lur esser per ina societad equilibrada. I dovra anc blier temp. Ed i dat anc blier da far. Sajan nus pia solidaricas cun las dunnas che s'exponan en la publicitad. Er sche nus sezzas n'essan forsa anc betg prontas dad ir davantvart cun la bindera. Tge fashais vus dunnas venderdi? Sche vus na giais betg a Cuira, forsa chattais almain in fazelet lila en stgaffa! Uschiglio dai in sguard en curtin! La siringia flurescha. Mettai in segn davant porta: In grond matg da flur siringia.